

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 19/6

4 ապրիլի 2017թ.

Քննարկվեց «Նոր Զովք» ՍՊԸ գանգատը ՀՀ ԿԱ ՊԵԿ ՕՀՎ 24.02.2017թ. թիվ 1110460 ակտի դեմ:

«Նոր Զովք» ՍՊԸ գանգատում բերված փաստարկները.

Համաձայն ՀՀ ԿԱ ՊԵԿ նախագահի 01.02.2017թ. թիվ 1110460 հանձնարարականի ՀՀ ՊԵԿ ՕՀՎ-ի կողմից 03.02.2017թ. հսկիչ-դրամարկղային մեքենաների կիրառման ճշտության ստուգման արդյունքում արձանագրվել է, որ «Նոր Զովք» ՍՊԸ (այսուհետ նաև՝ ընկերություն) ք.Երևան, Հանրապետության 71 և Սարյան 12-13 հասցեում գործող առևտրի սրահներում 03.02.2017թ. գանձապահներ՝ Գոհար Սարգսյանը և Լուսինե Սրապյանը, ՀԴՄ կտրոն չեն կարողացել տրամադրել հարկային ծրագրերի փոփոխման (խափանման) պատճառով: Միաժամանակ հայտնվում է, որ նախորդ օրը հարկային ծրագրերը աշխատել են անխափան: Այդ փաստը կարող են հավաստել նաև ընկերության ծրագրավորողները: Առևտրի գործարքի տվյալները մուտք է արվել ՕՀՎ ստուգողների ներկայությամբ, սակայն ՀԴՄ կտրոնը չի տպվել: Այդ բոլորը տեսանկարահանված է սրահի տեսախցիկներով:

Ընկերությունը ունի տեղեկություն, որ համանման խնդիր առկա է նաև «Կրպակ» խանութների ցանցում:

Այդ օրն ընկերության գլխավոր հաշվապահը գանգահարել է ՀՀ ՊԵԿ թեժ գիծ՝ ահազանգելով խնդրի մասին: Ընկերությանը տեղեկացվել է, որ հարկային ծրագրի հետ կապված խնդիր կա և փորձ է արվում կարգավորել խնդիրը:

Ելնելով վերոգրյալից՝ ընկերությունը խնդրում ք.Երևան, Հանրապետության 71 և Սարյան 12-13 հասցեում գործող առևտրի սրահներում ՀԴՄ կիրառման (շահագործման) վերաբերյալ ՕՀՎ ստուգողների կազմած ակտը համարել չեղյալ:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև՝ Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության.

Քննարկման ընթացքում նշվեց, որ ՀՀ ԿԱ ՊԵԿ նախագահի 01.02.2017թ. թիվ 1110460 հանձնարարագրի համաձայն «Նոր Զովք» ՍՊԸ-ում կատարվել է հսկիչ-դրամարկղային մեքենաների կիրառման ճշտության ստուգում: Արդյունքում կազմվել է ՀՀ ԿԱ ՊԵԿ ՕՀՎ 24.02.2017թ. թիվ 1110460 ակտը (այսուհետ նաև՝ Ակտ), որով լրացուցիչ վճարման է առաջադրվել 9.586.122 դրամ:

Ակտի 1-ին կետով մասնավորապես արձանագրվել է, որ ընկերությունը ք.Երևան, Հանրապետության 71 և Սարյան 12/13 հասցեներում գործող առևտրի օբյեկտներում տեղադրված հսկիչ-դրամարկղային մեքենաները շահագործելիս խախտել է ՀՀ կառավարության 01.08.2013թ. թիվ 846-Ն որոշմամբ հաստատված հսկիչ դրամարկղային մեքենաների կիրառման կարգի 17-րդ կետի պահանջները:

Սույն թվականի փետրվարի 3-ին նշված հասցեներում կանխիկ դրամով իրականացված գործարքներ կատարելիս ընկերության գանձապահը գումարը ՀԴՄ փաստացի չմուտքագրեց և ՀԴՄ կտրոն չտրամադրեց՝ Հանրապետության 71 հասցեում 1950 դրամի չափով և Սարյանի 12/13 հասցեում՝ 9400 դրամի չափով: Նույն կարգի 40-րդ կետի համաձայն օրենքով սահմանված պատասխանատվություն կիրառելու առումով հսկիչ-դրամարկղային մեքենաների շահագործման կանոնների խախտում է դիտվում գնված ապրանքի արժեքի ՀԴՄ չմուտքագրումը և կտրոնի չտրամադրումը:

Համաձայն «Հսկիչ-դրամարկղային մեքենաների կիրառման մասին» ՀՀ օրենքի 11-րդ հոդվածի 2-րդ կետի «բ» ենթակետի երկրորդ պարբերության՝ հսկիչ-դրամարկղային մեքենաների շահագործման կանոնների խախտմամբ հսկիչ-դրամարկղային մեքենաների կիրառման համար, մեկ տարվա ընթացքում նման խախտումն երկրորդ և ավելի անգամ կրկնելու դեպքում, կազմակերպությունը տուգանվում է գործունեության իրականացման վայրում տեղադրված հսկիչ-դրամարկղային մեքենաներով նախորդ եռամսյակի ընթացքում արձանագրված շրջանառության զրո ամբողջ յոթ տասնորդական տոկոսի չափով, բայց ոչ պակաս՝ վեց հարյուր հազար դրամից և նրա գործունեությունն այդ մասով ենթակա է կասեցման 10 օրով: Համաձայն ՀՀ ԿԱ ՊԵԿ ՏՏ վարչության պետի 13.02.2017թ. թիվ 6-1/1314893-17 գրության 2016թ. չորրորդ եռամսյակի ընթացքում ընկերության կողմից հսկիչ-դրամարկղային մեքենաներով Հանրապետության 71 հասցեում գործող առևտրի օբյեկտում արձանագրված շրջանառությունը կազմել է 679.090.266 դրամ, իսկ Սարյանի 12/13 հասցեում՝ 690.355.735 դրամ, ընդամենը՝ 1.369.446.001 դրամ: Արդյունքում ընկերությունը կատարած խախտումների համար տուգանվում է 9.586.122 դրամ:

Քննարկման ընթացքում ընկերության ներկայացուցիչը նշեց, որ 03.02.2017թ. ք.Երևան, Հանրապետության 71 և Սարյան 12/13 հասցեներում գործող առևտրի օբյեկտներում կատարված գնումների դիմաց ՀԴՄ կտրոններ չեն տրամադրվել հարկային ծրագրերի փոփոխման (խափանման) պատճառով: Առևտրի գործարքի վերաբերյալ տվյալները ստուգումն իրականացնող անձանց ներկայությամբ մուտքագրվել են ՀԴՄ, սակայն ՀԴՄ կտրոնները չեն տպվել: Այդ ամենը տեսանկարահանված է սրահի տեսախցիկների միջոցով:

Ընկերության ներկայացուցիչը Հանձնաժողովին ներկայացրեց տեսանյութը պարունակող կրիչը:

Հանձնաժողովի կողմից ուսումնասիրվել է ներկայացված տեսանյութը, որը, սակայն, վերաբերվում է միայն Սարյան 12/13 հասցեում գործող առևտրի օբյեկտում կատարված գնմանը:

Հարկ է նշել, որ ներկայացված տեսանյութը նկարահանվել է անմիջապես գանձապահի գլխավերևում տեղադրված տեսախցիկի միջոցով, ինչը հնարավորություն տալիս հստակ ֆիքսել գանձապահի գործողությունները:

Տվյալ դեպքում ներկայացված տեսանյութում երևում, թե ինչպես ստուգումն իրականացնող անձը կատարված գնումներով մոտենում է գանձապահին: Վերջինիս կողմից համապատասխան սարքի միջոցով ֆիքսվում են կատարված գնումները և որոշվում է դրանց ընդհանուր արժեքը: Ստուգումն իրականացնող անձը վճարում է 10.000 դրամ (երկու հատ 5000-ական թղթադրամ): Գանձապահը ստանում է կանխիկ գումարը և կատարված գնումների արժեքը մուտքագրում է ՀԴՄ ու սպասում

ՀԴՄ-ից կտրոնի դուրս գալուն: Ընդ որում, ներկայացված տեսանյութում հստակ երևում է, որ գանձապահը գումարը ՀԴՄ մուտքագրելուց հետո ձեռքը պարզում է, որպեսզի վերցնի ՀԴՄ-ից դուրս եկող կտրոնը, սակայն կտրոնը դուրս չի գալիս: Այդ նույն պահին ստուգումն իրականացնող անձը պահանջում է նաև երկու տուփ ծխախոտ, որի համար վճարում է 1000 դրամ: Գանձապահը, ստանալով երկու տուփ ծխախոտի համար վճարված գումարը, այն մուտքագրում է ՀԴՄ և տրամադրում է համապատասխան ՀԴՄ կտրոնը:

Քննարկվող դեպքում հարկ է արձանագրել նաև, որ ներկայացված տեսանյութում հստակ երևում է, որ մինչև ստուգումն իրականացնող անձին սպասարկելը, գանձապահը սպասարկում է մի շարք այլ հաճախորդների, որոնց սահմանված կարգով տրամադրվում են ՀԴՄ կտրոններ:

Հանձնաժողովը գտնում է, որ տվյալ դեպքում ներկայացված տեսագրությունն ապացուցում է ստուգման ընթացքում Սարյան 12/13 հասցեում գործող առևտրի օբյեկտում արձանագրված խախտման հետ կապված ընկերության մեղքի բացակայության հանգամանքը: Հետևապես, Սարյան 12/13 հասցեում գործող առևտրի օբյեկտում արձանագրված խախտման մասով Ակտով առաջադրված տուգանքը ենթակա է վերանայման:

Ինչ վերաբերվում է ստուգման ընթացքում Հանրապետության 71 հասցեում գործող առևտրի օբյեկտում արձանագրված խախտմանը, ապա այդ մասով որևէ ապացույց Հանձնաժողովին չի ներկայացվել: Այսինքն, գործում առկա ապացույցները հիմնավորում են Հանրապետության 71 հասցեում գործող առևտրի օբյեկտում կատարված գնման դիմաց ՀԴՄ կտրոն տրամադրված չլինելու՝ ընկերության կողմից ՀՀ կառավարության 01.08.2013թ. թիվ 846-Ն որոշմամբ հաստատված հսկիչ դրամարկղային մեքենաների կիրառման կարգի 17-րդ կետի պահանջները խախտված լինելու փաստը:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո ր ո շ ու մ է՝

ՀՀ ԿԱ ՊԵԿ ՕՀՎ 24.02.2017թ. թիվ 1110460 ակտով առաջադրված տուգանքը՝ գումարով 9.586.122 դրամ, նվազեցնել 4.832.490 դրամի չափով:

Հանձնաժողովի նախագահ՝



Վ.ՄԻՐՈՒՄՅԱՆ